



清刻龍藏佛說法變相圖

三經同卷

推五

佛說大乘方等要慧經

彌勒菩薩所問本願經

度一切諸佛境界智嚴經

佛說大乘方等要慧經

推五

後漢安息三藏安世高譯

聞如是一時佛遊於舍衛國爾時彌勒菩薩
 叉手白佛言世尊我欲小有所問若世尊聽
 敢有所問佛言若有所疑便問吾當為汝解
 說使意歡喜彌勒問言云何菩薩摩訶薩不
 退轉法於大乘有進而不耗減行菩薩道降
 伏魔怨如其狀貌悉還教知諸法相之根不
 歇於生死自有正慧不從他受疾成無上一
 切智地世尊讚曰善哉善哉所問隨順甚善

大佳吾當爲汝解說菩薩所得之行踰於所
問諦聽善思念之於是彌勒受教一心靜聽
佛告彌勒菩薩有八法具足疾速得無上一
切智地何謂爲八一者內性清淨二者所行
成就三者所施成就四者所願成就五者慈
成就六者悲成就七者善權成就八者智慧
成就是爲八事菩薩疾速得無上一切智地
彌勒菩薩及衆會皆歡喜

佛說大乘方等要慧經